

四庫全書

集部

欽定四庫全書

宋詩鈔卷二十三

內閣中書舍人吳之振編

鄭俠西塘詩鈔

鄭俠字介夫福清人第進士調光州司法叅軍秩滿入都見安石言新法非便安石不悅使監安上門會久旱俠繪門上所見流民困苦圖發馬遞投銀臺進之神宗覽圖噓唏罷新法浹日大雨用事者爭置俠

擅發馬遞之罪編管汀州改英州哲宗立放還除泉州錄事叅軍元符復送英州建中靖國放還復前職崇寧監衡山廟旋追毀前命勒停五年降告復將仕郎叙用俠遂不復出在英時號大慶居士還鄉所存唯一拂故又號一拂居士宣和元年忽夢鐵冠道士遺之詩視之乃予瞻也嘆曰吾將逝矣作詩云似此平生只藉天勝如過鳥在雲煙如今身畔無餘物贏得虛堂一枕眠授孫而卒年七十九嘉定中謚曰介俠

少苦學其古詩疎朴老直有次山東野之風不得以
當行格調律之

謝太守答詩萊州

閒齋掩畫扉疎竹間風韻兀坐無所為仰高方苦峻關
闕雨喜鵲如以捷來獻疑其喜過常精爽抑何頓謂當
有嘉賓結駟問原憲不然親交書萬里來問訊何意二
千石新書爛盈卷使者入衡門紅光十餘仞衣冠出蓬
室再拜望城闕開緘列宿動芒角相輝煥捧讀未終篇

欽降已三嘆譬如涉春波渺不知涯岸又若驚雷霆但
覺目眩轉誰言匹夫窮陋巷一簞飯篋有無價珍貴于
青玉案昨者鄙俚辭惟求指瑕豐敢期明月珠傾寫殊
不吝重重借褒譽許與良過分酷愛愚且直還憐貧且
困惟人最難知聖哲其猶恨自非明如日安得物無遁
程孔昔中途邂逅適所願傾蓋畢所懷日西不知倦聖
賢欣道合萬古直一瞬淒涼千載餘此道誰復振未聞
似今日曾不拜公面顧遇過所親思知久彌浚重念櫟

散材平生慕忠順青衫百僚末言責固所逭若其愛君
心豈以爵祿辨謂宜為民上必與同喜愠謂宜食君祿
寧當復私徇刀斧且滿前斯誠豈磨磷千載幸一時岩
廊拱堯舜變臯豈無人共鯨偶未竄眷委一失真聰明
不無亂出令以便民動皆為深患疲羸死飢凍重負遭
囚絆奔逃苟自活父子潛分散以天征不義如以雨蘓
旱簞食迎王師東征西夷怨未聞百萬師戈鋌日持玩
南取十數洞西開五六郡府庫為一空白骨成龍斷大

臣弄權柄生殺在顧盼威福不有歸佞邪尚何憚公忠
獲罪咎正直招訶譴幽恚鬱不伸變異以頻見陰陽為
之沴淫潦仍乾暵方且頌太平長歌事賡賛天子九重
門深居拱閒燕人人懷欺匿比周相引薦以俠觀此時
網維一何紊滔滔恐皆溺心竊擬手援是以屢上章指
陳幾欲遍初雖蒙嘉納終不離讒間棄逐來窮陬星霜
兩經閏簪紳滿朝著大半嗟排擯誰為憫窮褐粟帛推
餘羨誰為念孤獨齒牙借餘論重傷棄逐久不敢畧自

辯高堂有單親日久庭闈戀同時得罪人一赦皆從便
惟茲尚遠斥不許歸寧覲擬扣閭闔門明颺紫宸殿恨
無可言路勇決固所斷嗟嗟道云亡丈夫兒女懦勢利
同險巖風雲借餘便誰非顧金錢誰非思達宦孳孳顧
理義惻惻念寒畯如公今幾人百世紹休聞

觀孔義甫與謝致仕詩有感

人生足清閑天下第一福惜哉聲與利舉世方逐逐君
子耀軒裳小人腴口腹霜雪滿頤頤馳競心更速誰如

東山後清風千載續仁孝實天成聰明乃幾燭弱冠揖
高科聲華光煜煜騏驎駕夷途千里在舉足歲未再周
天官先上應宿皇華屢更指閭請分符竹端介奉高明
慈仁撫煢獨施設妙通神歡謳道相屬一旦遽上章幡
然謝羈束古人治官政五十曰艾服公年未五十懇請
竟從欲緬彼伋與軻進退遺佳躅三揖就恩榮一辭託
巖谷由公仕以觀其庶無愧慙東舉我田園負郭予室
屋兒姪幾百人圖史逾千軸親舊既周旋閨門更雍穆

賓來酒一樽興來碁一局吟嘯動煙雲詩書到僮僕寧
知地有仙但見人如玉乃覺世間人為生何局促譬如
方污垢對之獨薰沐孔公當代賢宜其欽愛酷慷慨出
長篇情殷語重複日日動歸思浩浩見林麓何意蒙鄙
人幸茲一觀矚當筵頓忘味如聽蕭韶曲平生粗意氣
自初得書讀每見古聖賢心常自程督知身是罪根每
每自鉏斲如彼善稼穡去草茂嘉穀深嘉遠世網有若
囚脫桎惟茲素艱貧事與心反覆歷官二紀周一紀投

南隲歸時異去時聖主恩霽霽方欣到家鄉足覺愁慮
簇高堂皓垂白甘旨不饒沃四弟兩背亡未言他骨肉
繼又喪一弟三房等窮蹙不數姆與婢孤孀十有六薄
業支半年一飯猶五穀蕭然夏秋際甚者日食粥人惟
有父子恩親家室睦惟知有君臣禮義朝廷肅二者苟
有違三靈共誅戮况茲生聖辰熙隆遇堯嚳艱虞免兵
革少小遊庠塾青春被恩擢名姓粗揚暴孰非累聖德
師誨而君牧中間更狂妄天聽常輕瀆云云不少已竟

致御史鞠所負鼎鑊輕敢意尚收錄日月忽中天湛恩
我濯浴父子實再逢君臣亦敦復新恩胡為報舊過云
何贖父母教子勤羽括而礪鏃朝夕望乃成榮顯被親
屬慈烏於反哺知以報生鞠學術不寸施猶之玉韞匱
千載邁明良不能少負輻是生天地間曾不如草木以
此望明公雲中一鴻鵠

臘月十八日呈子京

歲去如奔馬殘日十有三姪為當嫁女甥是未婚男叢

然猥俗併殊非力所堪嗟予本支離塵事素不叅東牀
書一架西榻經一函如是歲月深吻舌如騰絨惟有陶
淵明常欲其清談牀頭酒盈壺亦欲同醺酣二十一二
間煩事如掃芟期使堂下空宴笑同所耽清樽酌宜深
古語交蘄岩夜久燈熒熒金波忽東南歲宴獨優游
庶幾為不凡

示潮州吳宅三甥

大郎性純淑至寶受磨琢二郎姿秀美白璧光閃爍三

郎神照藏宛若雛在殼五彩翔鳳翰參差見斑駁三人
吾令甥亦嘗從吾學昊穹有顯通報應無舛錯未有祖
慶厚而招子孫薄二親又善教曾不閒飲啄甥雖多似
舅三子自超卓為文要根理覽古務詳博不惟子三人
萬世同矩矱慎勿學舅癡直指世奸惡心雖在規益世
誰受忠諤立身既不危青雲在挈攬

示女子

吾生鮮兒女汝次今居首柔惠少語言天性非矯揉女

生必有適二親非終守既嫁又他州安能長相就幸然
汝夫賢純淑真汝偶出門天其夫禮律其來久汝姑吾
之妹姑夫為汝舅事舅如事父事姑如事母三者無所
闕汝則無大咎門內有尊親門外有親友歲時或餽助
祭祀合奔走一一無間言乃可逃父醜治家在勤儉助
財戒多取誦經味其理聖心良可究即事念慈和無但
勞叨味善看育與蟾二子吾珠錡汝嫁既違鄉吾遷又
遠趣東去十八程西來二十九三四千里間吾視堂猶

牖人生否與泰正若夜隨晝但當道無虧不媿載與覆
憶昨汝初生時吾心有負以為臣事君即是子事父閨
門有危難誰不在惇疚推其愛父心誰不得前剖幸為
男兒身許國自結綬安能冷眼看終不一開口封章重
十上夫豈避鼎斧南州雖譴逐萬死蒙恩宥行行出國
門母馬吾徒步汝生未三月正當時襁乳雪片落鵝毛
霜簷懸凍溜汝母歛汝身寒風裂雙肘驅馳僅逾時粗
糲不敢吐殘春到貶所歲加俄及丑汝時年十二稍稍

近針縷是歲真龍躍重明登九五湛恩被遐荒漸清到
枯朽拜命走親庭便道從海浦既見汝姑賢汝乃吳氏
婦我乃緣他人譴斥循其舊人皆念再逐道路或攢皺
我以臣子心等視如榮授人生無患難憤勵亦何有况
茲尋前道復見迎賢堠旬月得相聚天與幸誠厚君命
不可緩病已斯馳驟南北出靡常惟祈各寧壽舉足念
其身行幽如白晝又當夙夜間警戒其君子神靈依正
直惟仁孝是祐書信或往來知汝無病苦為婦洎為母

皆不處人後定當舉家歡相慶酌大斗勝彼淚滂沱臨期一盃缶

六環助潮士鍾平仲納官輒辭贈以詩

揭陽繁富州鍾子處城閑怡然保清操不與世俗換豪家富廩庾鼠雀嫌陳爛鍾子無田園斗糴供晡旦甲第闕公門奴僮立如雁鍾子無使令其子供饋盟無妻備組紉無婢奉炊爨市屋十數椽屢商是隣畔暝陰滋蠹蝕飛屑落几案炎蒸鬱不通揮扇尚流汗絃誦不輟音

學海窮瀾漫文章有星斗胸臆藏璀璨何殊盛衣冠而
坐於塗炭下藥百十包虫腐皆逾半經年無人顧蛛網
潛滋蔓苦李十數株採摘亦素幹此外乃一無兒女不
蔽軒固非人所堪隨分亦侃侃何意官物租添輸告踰
貫太守為學校芹茹思樂泮買田垂萬年供給期無岸
誰人不樂輸我獨無計辨此時私愁憂幾至方寸亂我
身困長途脫身自投竄聞此心惻然不覺潛浩歎六環
聊助君驚股難廣獻聊欲分子憂使免頻勾喚知子謂

子貧不知謂矜慢斯則朋遊愆此時那可斷子猶重辭
讓揖拜如戰汗急取慎勿辭六環如六萬

再到吳子野歲寒堂

再到歲寒堂仍登歲寒閣閣上與堂前物物皆如昨鉄
幹偃虬龍雲峰自巖壑文章有神力辭筭光彩錯主人
歲寒翁古意何淡薄山肴具樽酒忻喜為我酌高論寫
胞懷千弩射鯨鱷速悟有寶龜靈通非火灼辯議恣酬
答亦以資笑謔想翁賓去後前局徐徐鑰萬卷羅目前

舒卷良自若盛暑一榻風初寒一爐藥脩然去與來一
箇無住着我亦淡泊人世味聊咀嚼無種不取嘗畢竟
何美惡但聞歲寒風便覺世齷齪今茲翁如龍看彼皆
尺蠖今茲翁如鴻視從皆籠縛故願歲寒翁高收歲寒
脚踏坐百千年看春華秋落無令木石心長笑人脆弱

古交行

大海有時竭此心瀝不乾厚地有時坼此心無裂文持
此以相照百鍊青銅昏用此以相惠貝璵黃金盤覲面

有餘歡背面無間言德義以相高慶譽以相先千古似
一日萬里如同筵此為金石交誰與知者論

教子孫讀書

水在盤盂中可以鑑毛髮盤盂若動搖星日亦不察鏡
在臺架上可以照顏色臺架若動搖眉目不可辨精神
在人身水鏡為擬倫身定則神凝明于鳥兔輪是以學
道者要先安其身坐欲安如山行若畏動塵目不妄動
視口不妄談論儼然望而畏暴慢不得親淡然虛而一

志慮則不分眼見口即誦耳識潛自聞神焉默省記如
口味甘珍一遍勝十遍不令人艱辛

賦公悅席上事送周如京

逢世路分

疑誤

歸洛陽有客邂逅樵溪曲高談傾蓋萬珠

璣相對崇朝惟不足武陽太守山簡徒喜賢樂事天下
無為客留公駐斯須精庖饌玉歌貫珠坐中賓客皆豪
傑凜凜清風生頰舌性情浩浩談云云不待酒味既凜
冽遂巡行幕如風翻二妹新出屏幃間一人捧心餘故

態對客悄悄眉峰攢一人襜褕半雲霧仙袂應曲飄飄
舉解作陽關意外聲舊人只把花卿數此宵嘉會世所
稀席上更覽周侯詩彫金有格但聞說不覽新集那得
知俠于周侯非甚舊朋友十輩識公九此公惜別事如
何反覆清篇還執手龍韜虎畧何處藏却向吟筆呈鋒
鋌堪作太平祥瑞錄將軍白首弄篇章

謝太守惠酒

重陰未肯避陽明飄風驟雨加震凌正月已缺二月近

滴水成凍威稜稜帝雖乘震利發生令猶行冬重嚴穀
鷺皆喬遷忽入谷魚已弄煖翻藏水此時草木亦成愁
祇恐不得達其萌吁嗟羈窮影弔形安得恣然如無情
明良會合千載遇乃以罪棄投荒荆單親萬里頭應雪
不得朝晚奉甘馨閩嶺之南方弄兵殺氣殊與生成爭
既不能輔助聖時使咸若又不得慷慨帝前效昔人之
請纓詩書滿腹浪自飽一句不得推而行身雖兀坐心
惕驚愁緒忽起填胸膈但聽曠野深林調刁刁如有

神號鬼泣聲真江太守真慈明惠施每每先單執眼前
突兀雙玉瓶滿貯玉液清泠泠拜公之賜未敢傾不覺
失笑三閭生不學憔悴思獨醒哺糟啜醢隨其朋往往
一飲一石五斗解醒被人呼作生劉伶雖然遇酒而酩
酊心不汝醉神亦寧開樽又飲太守德和氣坐覺生簷
楹不知凝冽自何去至于愁思皆自澄乃知春功亦不
遠緘封祇在瓶與罌安得遽爾披重雲劃見白日臨青
冥和氣習習扇九壤枯枝朽質爭敷榮風雨時泰階平

聖君萬壽寰海清細草輕煙日邊路鳳管龍絲細可聽
有耳不聞聲與鉦有目不識旗與旌聖功浩蕩不可名

醉翁行贈黎師醇

金峰醉翁七十九行步龍鍾面黧垢惟有滿腹奇文章
日月爭新無老醜頰舌鏘洋言不苟咳唾成珠須信有
兩眼如星照耀人見客偏明儼如舊問翁壯年愛碁酒
適日還如昔時否曰予不戰猶好看日飲常能傾一斗
因持碁酒前就翁明日壺漿復予就朱君貧苦亦好奇

接續攜持窮清畫城中
遑遑競趨走覲面草草忘親友
幾人樽俎暫從容
笑傲松篁弄花柳
寧知北郭予三人
繼日相從辰到酉
龐眉皓髮常溫然
相見妙齡眉目秀
惜哉才高命蹇成遺滯
四十餘年州縣吏
棄之林野混漁樵
徒使知音動嗟喟
愚聞天道高遠不容人
測度無奈人能樂其樂
故有鼓琴重圍行歌遺
穰浩然充塞不以世俗
瑣屑累寥廓
愚觀翁之子孫
詵詵繩繩此其後
慶為不薄世俗母以翁
老生輕心須知此翁頭
白面黧

而英心義氣天地不得而銷鑠

連州斛嶺寨井

斛嶺寨行雲際下視長江入地底汲江登嶺行三里躋
攀峻險為艱爾將率居民幾半千度歲終年苦無水爰
自慶厯達元符循舊安常誰擬議元符太守何公賢愛
民慮事誠而至以為山頂流泉鮮其事吾觀古人行師
動萬億所至豈必皆平地軍必有井井未達將渴不敢
聞衆耳陰陽者流以水照星星之所聚泉所委行行浚

鑿三日遇泉井成矣乃今三井如鼎趾豈特當年負瓶
操縵僕僕往還之人為慰喜吾欲後之人知井所以起
敬守前功無委圯必使甃砌長如今日之清泚萬萬斯
年施何已故作此歌勒諸斛嶺之市

芭苴行

芭苴來芭苴去封書裏信不得住君不見箕山之下有
仁人室無杯器以手捧水不願風瓢挂高樹

瑞像閣同楊驥雪夜飲酒

濃雪暴寒齋寒齋豈怕哉書隨更漏盡春逐酒瓶開一
酌留孔孟再酌招賜回酌酌入詩句同上玉樓臺

和荊公何處難忘酒詩

何處難緘口熙寧正失中四方三面戰十室九家空見
佞眸如水聞忠耳似聾君門深萬里安得此言通

次張子京遊天王湖作

湖上遲遲不忍還談玄清徹幾重關旋嵐野馬皆歸靜
逝鳥潛魚各自閒墜果露巢秋後樹淡煙斜日晚來山

吟情到此何終極
注目紅雲紫霧間

同子忠上西樓

偶因送客上西樓
共愛佳城枕海陬
雁翅人家千巷陌
犬牙商泊數汀洲
風吹細雨兼秋淨
雲漏疎星帶水流
獨有單親頭早白
迢迢東望不勝愁

次孟堅初冬晴和見梨桃二花作

十月南天尚暑襟
幽花何怪動清吟
半扉素蕊呈修徑
幾朵天紅出茂林
地借小春回暖氣
日勻疎影轉輕陰

惟應幕府多才俊不負行臺醉賞心

幽居

蕭條深巷寄門牆城郭村居事異常石展地衣三藥徑
錦圍天柱十花牆幽禽隔樹鉤膠語異草搖風合和香
不覺冬歸與春到但知無事日偏長

煙雨樓

仙人居處即鼇宮更作層樓峭倚空羣岫西來煙漠漠
大江南去雨濛濛花鑣柳策熙怡裏耘笠漁蓑笑語中

別有夜楹千里月凭欄清興與誰同

示潮州妹子

八人兄弟三人在獨立他州信汝賢直使無情如槁木
忍看垂淚念南遷從今依舊歌泉水何物偏宜寄謫仙
美酒年年須百甕好從南海便乘船

和子京霜字見寄

秋深園圃雖無雨晚歲頭鬢自有霜身事無功且人事
酒囊餘地乃書囊寒鴉嘯侶鳴喬木粉蝶成圍過矮牆

對此每思良友伴幸時來訪浣愁腸

次韻知郡登高言懷

莫向天涯說故鄉人身不似雁隨陽黃花滿手空佳節
千里有懷如寸腸為許功名酬聖代不須愁緒付瑤觴
男兒不是閨中物生則桑弧射四方

次韻張老見贈

烏鵲螻蟻有君臣此義如何易世塵欲為無窮宗社計
有憂如幻歿生身八千江上奔馳路十二天南黯淡春

歸到親闈捧杯酒始知終是福唐人

觀碁

三百六十路通精此有門數竒藏日月機發動乾坤對
面知為敵渾輸却有翻詐貪常易喪仁守乃長存隻子
如輕用全功更莫論就令投險勝寧抵被圍奔縱得四
方盡寧同一腹尊傍觀饒好着當局奈嗔言慙媿中孚
信幾危大壯藩坐觀成敗者安得不驚魂

出御史臺

萬險千艱六出身如今也得避
器塵須知從此寒原上有箇
行歌拾穗人

道中見以索牽五六十人監理錢者

可憐平地不生錢稚老累累被索連
困苦新圖誰畫此
祇愁中禁又無眠

宋詩鈔卷二十三

欽定四庫全書

集部
宋詩鈔卷二十四

詳校官中書臣賈鉉

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷二十四

內閣中書舍人吳之振編

廣陵詩鈔

王令字逢原廣陵人也年十數歲與里人滿執中為
友偉節高行特立于時王安石赴召道由淮南令賦
南山之田詩往見之安石大喜期其材可與共功業
于天下因妻以其夫人之女弟年二十八而卒令詩

學韓孟而識度高遠非安石所及不但以壞奇也惜
限於年耳

寒林石屏

號山之遠數千里號石之重難將持舟車號來每苦重
金盞尚棄不有攜苟非世尚且奇怪孰有甚遠載以來
何況號人自珍秘得一不換千瓊瑰流傳中州盛稱尚
主以詫客客見祈世人賤真珍貴假見者喜色留膚皮
強材美幹立修蔭羅列滿野誰復窺我嘗客坐例一見

實亦可愛小且奇初疑秋波瑩明淨魚子變怪成蛟螭
鱗鬚爪角尚小碎但見蜿蜒相參差又如開張一尺素
醉筆倒畫胡髯髭如何石上非自然猶是軟弱從風枝
高樓曉憑秋色老煙容雨氣相蒙垂喬林隱約出天際
醉目遠瞋分茫微不然誰家老圖畫破碎偶此一片遺
借令人手弄點畫尚恐巧拙成瑕疵如何石理自生長
安得當世無猜疑高堆黃金募辨說萬口利銳如磨錐
或云南山產巨怪意欲手把乾坤移先偷日月送巖底

次取草木陰栽培天公怒恐寢成就六丁挑斧摩雲揮
世人乘此得分裂鍛琢片段賡財資至今風雨號山夜
樹石號作神鬼悲又云春氣入山骨欲自石裏生蒿藜
根株芽枿未及出卒遇匠手相鑿墮多稱老松已變石
此固剪截根鬚離又云鬼手亦能畫多向石室成屏帷
固知物怪浩難盡誰能向此明是非城狐老能男女變
海蜃口或樓臺吹世間自是有此類何必詰曲窮所歸
細思此屏竟無用石不中磧木莫一作不支徒將文理有

小異招聚瞽說成籠欺吐哉閉口不復論為語愛者無
我譏

贈慎東美伯筠

世網掛士如蛛絲大不及取小綴之宜乎倜儻不低斂
醉脚倒踏青雲歸前日才能始誰播一口驚張萬誇和
雷公訴帝喘似吹一作乞
沙淹盛恐聲名塞天破文章喜以

怪自娛不肖裁縮要有餘多為峭句不姿媚天骨老硬
無皮膚人傳書染莫對當破卵驚出鸞鳳翔間或老筆

不肖屈鐵索縛急蛟龍僵少年倚氣狂不羈虎骨挿翼
赤日飛欲將獨立跨萬世笑謂李白為癡一作兒四天
無壁纔可家醉膽憤癢遣酒拏欲偷北斗酌竭海力拔
太華鏖鯨牙世儒口軟聲如蠅好于壯士為忌憎我獨
久仰願得見浩歌不敢兒女聲

寄題韓丞相定州閱古堂

始聞定作閱古堂又聞定有閱古詩揚之遠定五千里
思得兩翅擘以飛偶聞人來說堂事初啟兩壁無塵疵

問時公來命繪匠親以玉指交畫揮教令某載若某狀
匠拜奉命唯不辭左圖守相父母吏右狀將帥熊羆姿
長冠峨峨偉笏佩闔以玄白為裳衣屹如丁寧立以議
遜若避讓行而隨圖成嚴毅色可讐過吏不敢竊目窺
仍令大筆署行事寫出黑膽朱肝脾死者有靈如不泯
合有英氣來附茲故公之謀不知出宜有神鬼一作物陰
助奇茫茫九泉謂已朽豈意一旦存形儀請留中璧素
莫繪待千歲後公以歸當搜國匠第一手狀寫公像存

依稀要知文完武純備遺與萬世瞻思資我知觀者足
隨淚不復峴首羊公碑又聞當世大手筆磊砢詩句相
撐支手搏蛟龍拔獬角爪擘虎豹全脫皮鄆州溪堂遂
寂寞韓詩塵蔽人不吹想應從此傳萬世粹玉貫串珠
縈纍小戎何為尚縮伏久滯公斧血不滋何時功成事

業就兩手一掃清三壺

一作陸

歸來天子喜以領泰階輝

煥平無畎次招當世草茅士各使呈露心腹披締裾聯
纓上廊廟留與後世圖為師然後回謝闕古堂彼合異

代今一時

龍興雙樹

春城花草窮朱殷
俗兒趣走脚欲穿
閒來無惊喜自適
時到雙樹為奇觀
駐如天官植幢蓋
毅然若壯士蒼衣冠
老枝叉牙忽並出
似欲併力擎青天
靈根深盤不可究
疑與地軸相拘攣
不知培栽竟誰手
而又始植為何年
行捫步遶不可問
但見茂色連雲煙
東風牽人少游此
佛屋日日重門闕
雖有大蔭人不及
于此尤得志士憐

東蒿為楹檁為柱居者略不憂其顛廼令遺材抱美植
不得總載桶與椽高堂傾歌未支柱匠者日亦經其邊
不思大幹有強用反以斧鈍難其堅吁哉誰是愛材者
定知惜此雙樹篇

原蝗

蝗生於

一作滿

野誰所為秋一母死遺百兒埋藏地下不

腐蝦殼有鬼黨相收

一作扶

持寒禽冬饑啄地食拾掇穀

種無餘遺叨雖掠卵不加破意似留與人為饑去年冬

溫臘雪少土脈不凍無冰嘶春氣蒸炊出地面戢戢密
若在釜糜老農頑愚不識事小不撲滅大莫追遂令相
聚成氣勢來若大水無垠涯蓬蒿滿眼幸無用爾縱嚼
盡誰爾譏而何存留不咀嚼反向禾黍加傷夷鴟鵂啄
銜各取飽充實腸腹如撐支兒童跳躍仰面笑却愛甚
密嫌疎稀吾思萬物造作始一一盡可天理推四其行
蹄翼不假上既載一作戴角齒乃虧夫何此獨出羣類既
使跳躍仍令飛麒麟千載或一作始一見仁足不忍踏草

萎鳳凰偶出即為瑞亦曰竹食梧桐棲彼何甚少此何
衆况又口腹害不訾遂令思慮不可及萬目仰面號天
私天公被誣莫自辨慘慘白日陰無輝而余昏狂不自
度欲盡物理窮毫絲要祛衆惑運獨見中夜力為窮所
思始知在人不在天譬之蚤虱生裳衣捫搜撥捉要歸
盡是豈人者尚好之然而身常不絕種豈此垢舊招致
斯魚枯生蟲肉腐蠹理有常爾夫何疑誰為憂國太息
者應喜我有原蝗詩

題滿氏申申亭

申申亭者名自誰河東丈人身銘一作名之方其作亭自

休息固欲申暢名其題雖然自奉頗優樂豈敢兼忽當

世為若曰所憂非所及因以遯世無悶辭丈人踈高喜

自適去不限約來無時門無賓僚車馬絕室有几杖衣

冠一作巾冠歌夜徑行招海月伴晝榻坐與天雲期春林暄

和鳥聲好勝聽俗論相啞一作吟塵埃縱爾得風力卒

不到此徒自飛亭前朱朱有冶態亭下白白無俗姿好

木留存竟見實惡草鋤拔無容次嘗聞景勝未易敵須
有大句相參差故吾經年不敢往日望詩老力可支偶
來為游適已晚花梢尚有春餘遺高哦遶樹惜時節拾
嚼紅片行逶遲回看北林竹萬箇寒氣一作翠欲起凌人
威清風時來助氣勢塞甲夜聚言語私方將投閒日來
此腳踏樹下成交蹊無端塵土又為隔明日跨馬西北
馳心思夢好定頻到不必直俟歸風吹

開太學議

白日流上天牛蝨無遁形萬目盡為用而不駭日明穴
鼠夜值螢嗾族相聚驚鼠穴不日通鼠足不日行已矣
不日識迺此螢燭矜鮪蝦陷井坎莫與江海爭籬禽不
天飛詎識雲漢冥吐哉浮薄兒勉為高大營

贈別晏成績懋父太祝

懋甫相門兒家世沓纓統早年綴官簿青衫蔚於莢本
宜多驕矜不謂銳義敢意貪英雄交一手欲四攬偶來
濫予會臂搦首已領酒獍誇胸襟頂踵都一膽壯心羞

摧藏義肉喜沮歎要言相死從

一作死
相從

顧豈苟難斬聽

其自陳論峭拔不平漸要之當一切固合不黜黜

一作黜

憶余少年時亦自喜黜濶于今老而悔壯意日凋減惜

夫相遇遲君放我亦檢驟聞強大語若虎餓得啗已無

相高心徒有志氣感春風吹天昏醉目睨愁黯念當相

別去兩懷不無慙何時重來過慰我涸轍險惟其別去

後猶一飽復歎幸因西南風時作寄我槩

夢蝗

至和改元之一年有蝗不知自何來朝飛蔽天不見日
若以萬布篩塵灰暮行噬地赤千頃積壘數尺交相埋
樹皮竹顛盡剝枯况又草穀之根芟一蝗百兒月再孕
漸恐高厚塞九垓嘉禾美草不敢惜却恐壓地陷入海
萬生未死饑餓間支骸遂轉蛟龍醢羣農聚哭天血滴
地爛皮蒼蒼冥冥遠復遠天聞不聞不可知我時為之
悲墮淚注兩目發為疾蝗詩憤掃百筆禿一吟青天白
日昏兩誦九原萬鬼哭私心直冀天耳聞半夜起立三

千讀上天未聞間忽作遇蝗夢夢蝗千萬來我前口似
嚙嚙色似冤初時吻角猶唧唧終遂大論如人然問我
子何愚乃有疾我詩我爾各生不相預子何詩我盍陳
之我時憤且驚噪舌生條枝謂此腐穢餘敢來為人譏
爾雖族黨多我謀久已就方將訴天公借我巨靈手盡
拔東南竹柏松屈鐵纏縛都為帚掃爾納海壓以山使
爾萬喙同一朽尚敢託人言議我詩可否羣蝗顧我嗟
不謂相望多我欲為子言幸子未易嘲我雖身為蝗心

煩通爾人爾人相招呼飲啜為主賓賓飲啜嚼百豆爵
主不加詬翻歡欣此竟果有否子盍來我陳予應之曰
然此固人間禮儼介迎召來飲食固可喜蝗曰予言然
予食何愧哉我豈能自生人自召我來啜食借使我過
甚從而加詬爾亦乖嘗聞爾人中貴賤等第殊雍雍材
能官雅雅仁義儒脫剝虎豹皮假借堯舜趨齒牙隱針
錐腹腸包蟲蛆開口有福威頗指轉賞誅四海應呼吸
千里隨卷舒割剝赤子身飲血肥皮膚噬啖善人黨嚼

口不肖吐連牀列筭筌別屋閒嬪妹一身萬椽家一口

千倉儲兒童襲公卿奴婢聯簪裾犬豕羹膏粱馬廐餘

繡塗其次爾人間兵旱倡優徒

一作兵倡
釋老徒

子不父而父

妻不夫而夫臣不君爾事民不家爾居目不識牛桑手

不親犁鋤平時不把兵皮革包矛艾開口坐待食萬廩

傾所須家世不藏機繪繡繚

一作繡
繪錦

衣襦高堂傾美酒

鬻肉鱠百魚良材琢梓楠重屋擎空虛貧者無室廬父

子一席居賤者餓無食妻子相對吁貴賤雖云異其類

同一初此固人食人爾責反捨且我類蝗自名所食況
有餘吳饑可食越齊饑食魯邾吾害尚可逃爾害必不
除而作疾我詩子言得無迂

寄滿執中子權

吾愛子權詩苦嚼味不盡窮思欲名狀百比無一近初
如貪追兵屢請忽許進旗旄交叉幢戟劒後先刃方爭
奮拏先忽覩斬亂狗徐驅得平郊萬甲合一陣偏裨走
起頗中堅坐吳牘喊呀闌志酣髣髴窮敵訥前軍奔交

兵後馬走斷紉須臾聲金休萬噪快一雋羣降挑戈矛
叩拜乞用釁蒼黃請命間竊視不敢瞬玄雲壓空虛半
夜暴震震睡耳起欲掩驚仆失肝腎壯者固已然況余
乃齟齬及其久詳味欲吐復自恡有如羅百珍次第嚼
嚼順貪豐不辭多愛美忘餘餒故其留人口雖久咽喉
潤何時匹馬來一作東畏愛氣兩振唯其未合間如不獲
謝蘭望風為此詩顛倒猶合燼

再寄滿子權二首

秋近啼哀蟲君思云奈何我愚得君思合少君賢勞我
心則多非獨辭源長瀉海為江河平生未始有點缺玉
日拂拭金燒磨尋常獮與狸見一足已蹉又況一地卧
三虎狗疏雖勇何敢過揚州我何思青山無一螺午市
不畜寶米鹽纔如它而吾三夫子一身各丘軻瓊林自
生寒結霧成冰柯文章日組緯玉機飛金梭誰有真珠
繩結何張麟羅拔為當世祥聲為太廟歌我願參衆民
手足搖娑娑

有錢莫買金多買江東紙江東紙白如春雲獨君詩筆
宜相親綴聯卷大十牛腹要盡寄我無寄人我將攜之

東

一作攜之
東海去

腳踏海水洗齒唇轉來清澈飲百斛蕩滌

腸肺無纖塵嘗聞泰山高高處天為鄰借如無梯不得
上亦欲大叫呼天神鋪陳君所詩譟口雷鼓振世多俗
耳既莫告當冀上帝依稀聞正聲定不感凡類舞躍百
鳳千龍鱗安能學俗兒一卷不復伸天公聞否尚未快

一作

安得鐵翼穿秋旻

答東徽之索詩

世味久已諳多惡竟少好惟詩素所嗜決切欲淡造人
安已不休衆恥我獨冒有如獺行跡欲改復自蹈肝腸
困搜尋吻舌倦搏造心靈無餘多為此日有耗已勤尚
無成既苦每自勞自笑如秋蟬饑極不止噪努力排韓
門屈拜媚孟竈惟此二公才百牛飽懷抱我如餓旁
旁飢者眊眊不得搞不知去幾多窮行竟未到無門隔藩
籬發踣窺堂與愛之不可入抵觸發狂譟借使苟有成

不知竟何要孤名非所求
弊俗詎足傲况乃非所及
窮海未為浩不知何時休
定訖死與耄因疑今世人
恐有我同操徽之才超高
竿幢出標纛為學尚淹蘊
富橐不肖暴文章內朱豹
外襲一以皂大論尤堅強
推舟出行界珉硃不施功
徑欲制珪琬幸此不我陋
教誨日陳告昨因語及詩
請我使自道屢謝不得命
迫窄遂顛倒被堅誘羸兵
伏銳待穿盜取勝雖必然
寃窮亦堪悼勉為瓦礫投
幸有金珠一作珠玉報

寄滿居中衡父

前會去莫追後見來無期別嘆後見難悔恨前會稀惟

吾衡父兄

一作友

金純玉光輝裁磨殺圭角不與瓦礫齊

大匠陶百室不間履下沉一衡舉千鈞何棄毫與釐余

獨胡為人乃不忍使遺有如橫道芻萬足踏不殺子何

嗜好殊獨俯掇

一作拾

以歸整束使不茨欲令雜蘭芝蘭

芝有花香芻賤雜則非然其厠置間適與薰染資文章

每借觀罅隙窺晴曦議論使坐聽穴牘聞英池春園或

承招遊騎亦許隨劇雲愛風枝藝火圍夜甚縱談心

一作

襟開張倒笑冠欹披匹馬載以來東首頸胆疲夜夢不
厭勞百里夕一馳想見目與眉百障千藩籬不虞自投
置遂若鳥遭竊何時獲因緣連筆促馬蹄誓當盡晨昏
不復起退辭

謝李常伯

人從東南來忽得連紙詩行義不赫暕名聲無姜蕤雖
常誤見辱旋則拜席歸別久謂已忘不圖猶記之長封

大書字顧我已怛怛開滕把之讀推與果失宜剝虎蒙
羊猪借使出類奇見豺先自奔遇豢還羣隨是故古之
人爲已賤若斯有聞未之行季路恐不虛名浮過所實
軻也耻以非今而承所賜廼此亦可噫賢者寧過哉當
是我有欺恐愧讀終篇喜驚改肝脾寧寧誨教言舉舉
仁義辭初令探本根喻以海與池乾坤老六經遺編爛
孔姬尚恐惑異說教之無遷移強聞終日乾仁不三月
違卒以二者終要我勉不疑百誦百再拜下淚如掛縻

交朋百愚諛此語聞之誰憶初從粹翁睡耳忽得提震
驚破百昏寐覺悼前迷今而去之久茅塞心叢茨驟承
夫子言快斧加芟蕪舊穢忽剗銷新涂坦平夷念當不
捨去戴服同冠衣猶恐免袒間復作須臾離且將鏡之
心不止涅之皮二者苟一能終始庶不遺平生若嗜詩
此篇況驟馳喁喁夜不休齟齬午忘饑仰嗟天骨雄俯
嘆人莫為星明有常高日圓無食虧讀久口益饒舌軟
涎流垂想當措意初嚼雲吐虹蜺屑牙哆華鮮肺腸涌

光輝故其紙上言飄有霄漢姿何可對酬謝約海量珠璣

對月憶滿子權

長風掠海來吹月散百鍊

一作白鍊

青天豁四壁雲靄不容

線窗軒颯先秋露氣入簾扇寬

一作空

庭生夜涼蚊口不

得擅人靜暮客去坐偃適自便清牽睡思醒明發醉膽

健披風睨白月瞪視不為眩未甘景獨勝思出大句銜

狂搜得無奇猛吐復自吮篇成若奴婢氣骨終几賤置

棄不復收嘆感退自旋起探君寄詩兀坐諷百遍駭哉
劇雄勁百札洞一箭間逢騁新奇春雲弄晴霰古意終
重厚九鼎掛一鉞吾嘗笑夫人語富則自願及嬰愛君
念始自信惓惓閱女嘗求孀慕士在護彥鄙哉尋常者
何用目識徧得逢誠幸多既別遂堪嘯乖離時况久會
合卜未先思之不可見飛魂不身戀秋城崔嵬高圍我
屹若圈安得擘風翅飛出自殿巧為相見謀反覆竟
未善惟當遠相要共借月為面相離苟同天舉目亦兩

見又况相去間纔止百里縣不知竟可否寄詩代請勸

八檜圖

客有要我八檜吟手攜八檜圖來懸掛張滿壁揚可駭
眄顧左右同嗟嘆旁摹石刻署名狀各有憑附相黃緣
或高相扶互倚礙或斷欲蹙猶支顛強枝拗回信有力
高幹復俯蛟蚪拳尋根及株連條葉例不拔直皆旁偏
雷波風休雲雨去蛇龍鬪歟猶鈎纏安分爪角一作牙與
尾鬣徒見上下相蜿蜒不知生時竟何謂畧不參類常

木然宜乎今古惑昧者搖擺古叻歸之仙一尤盤拳老

高大傳云

一作曰

聃老由飛躍當時駕鹿蹏以上跡有町

瞳遺相連多應蜎殘鳥喙啄不爾誕者強鑿鑄聃能惑
人已自幸豈此上去能欺天借如聃功可升躍鹿亦何
幸飛相聯于中一本特甚異膚革逆理紐左旋傳云聃
手所自樹我知此語定鑿穿苟令實為聃老植推以天
意猶可言當年曷不紐以右若曰世為左道牽如何衆
輒不省究反重神怪令聃專乾坤中含萬品彙此獨自

異誰令旃

一作殊
陶甄

窮思竟慮莫可索欲世不惑誰能奪

仙書虛荒喜誕妄推說事理尤綿延世人一讀卽化變
日望飛奮相迷顛豈非此木久樹此浸漬亦為異說遷
故其形植與生歿時以異怪招驚憐先時世不早斤斧
放其老大訛誇傳當年同生好材幹半以直伐成燒燃
憑妖附誕相樹立卒自歿活終完全葉枝凋疎不有陰
材直弗枉曲莫輟不知留存護養者竟以何理惜不捐
我有尺鐵大剛利久已鑄斧磨山巔卒無柯柄尚棄置

懶乞月桂求嬋娟

秋夜

秋夕不自曉百蟲齊一鳴時節適使然鼓脅亦有聲爭
喧鼠公盜悲牽虵陰行獨有東家難苦心為昏明

答東孝先

純金出鎔爐烜赫掩熾火錦成洗春江衆目眩莫奈魚
鹽物誠微誤用幸不浣君家兄弟賢我見始驚夥文章
露光芒藏蘊包叢脞關門當自足何暇更待我固知仁

人心姑欲恤窮餓苟論才不才自合棄如唾憶昨西來
初戚惕待客坐交持駕說口張闔不可鑠間發辨經義
鐵舌莫摩挫高文忽下投白日駭天墮眩怖欲前掩布
帛不可裹初觀固宜驚獨獲亦堪賀又如遇貴人繡錦
飾婀娜回眸忽自鑑惡面復窶裸屈降心已甘嘆憤志
亦頗雄高豈復爭愛恤亦加荷大詩又一作忽來及推與
太浮過自無賢可稱以是惡甚播譬如享甦人豆食止
則可苟強擔石負蹉跎適足禍何以論報心結草效鬼

魏一作穎

寄洪與權

與權江南來適自滿門會初無合我志纔以客面待時
時相鉤探稍稍互酬對根源豁波張扁鑄失分解君然
領還嗟我恐敬若戴相逢時既多相待兩交快予初請
子交子曰何可外中又謝不德卒曰吾而愛既而第以
年子合我兄拜揚雖士云多往往事冠帶中間滿夫子
崛起百萬最更以子從之而吾來則裨朋從偶許攀會

合日與在春晨巧誇招月夕因論話書狂逸飛蛇碁毒
甚含蠱相謀務奇勝聚口笑拙敗貪驩不知久歲律忽
移再余饑奔先西餓色面留菜子待去亦恨書以問我
奈別來君何如思子我心悔朋分無舊歡世險有新態
高言足瑕疵俗學牽細碎貧知身責重病覺學力怠壯
心已無多況去日有退預期後相見頑陋徒老大好勤
寄余書思子百憂萃

寄滿子權

子權今謂何久不治簡書子素賜我多豈以此遂疎予
亦如常時病與貧相俱冉冉草沒階客脚不踏廬貴者
事名位崖岸誇懸殊賢者縱有來顧我欲取無惟餘齷
齷徒吾亦羞與居潭潭一室空編帙環三隅暴陽不憂
償偷飽幸未誅且可延朝昏憂思老頑愚獨有思子懷
涕下時喑鳴

冬陰寄滿子權

玄雲載雨惜不下北風吹急冰相黏周遮覆蓋不通透

錮結已厚難披燭微陽未復老陰壯記去暖律時猶淹
青天何可一日失漸恐此去無由瞻日馭自懼不得脫
略出急入地下潛憑陰託寒恣凌爍風伯得意一作欣

志

欣

沾沾但幸天公不省悟誰顧下地人嗟讒隔絕霜露曠
不下帝有潤澤何由霑非惟勾芽凍夭折亦恐萬類由
茲殲九龍銜火互相煖稱有日職借不甘羣兒銳奮不
量度欲仰吐氣吁以炎惟有壯士抱劍卧思得美酒聊
自酣

弱弱誰氏子

弱弱誰氏子鮮鮮一何姝來奔富人家妻與富人俱

一作

居嚴一作華

粧問夫子我豈彼室如夫子笑遣之彼寧與

汝都升堂

一作褰裳

由阼階德色溢以舒親賓不敢笑退語

相戲吁高堂聚羣婢唯諾相咨睢家事忽不圖顧指取

自如朝令折桂薪暮遣藩籬除風雨半夜來百蠻生

不虞屋壓盜隨至夫死別嫁夫東鄰有淑子性

一作恬不

事鉞朱端居待人求正色不願諛清鏡見

一作照

白髮行

媒不顧閭不知愛妻人取捨何異歟

答黃藪富道

角角適時足力走猶或遲從而逮人不若坐視之而
予始用此已無先人思間自念斯世固亦未易為以其
得而慚曷若退自宜老身可孔顏饑歎猶夷齊予心最
樂此尤喜用自持豈將六尺軀賤易五穀皮但無百畝
田得一作可抱剛氣歸年來事窮蹙露暴無自依姊寡不
能嫁一作無為家又作不得家兒孤牽我啼平生事文字無路活寒

饑勉從進士科束若縛襁兒時時忍自笑

一作笑
自忍

往往

窮加悲

一作還
窮悲

有如高飛鳥中路饑自低銳知從食來

不

一作
豈

意身投繯神龍拏白日挾雨萬里飛使其口有

銜安得無馴隨雖然平生志固未忍散遺間時自開縱

哦吟助噓噓纔將舒已私豈敢偷人知黃君道德者術

業何煩煩手提九篇鐘旁取折籥吹縣知失氣類誤以

倡和期不知里社歌不可郊廟施况余衰病餘有氣亦

已卑加之困俗學犴角方牽羸陳詩盡自道幸子憐無

疵

一作
班

春風

春風東來暖如噓過拂我面
撩我裾不知我心老有異
亦欲調我兒女如庭前花
枝笑自愛風裏草力更相
扶
旁林曲樹足飛鳥不聞燕
雀鴟鵂鳥求雌要雄各有
意
豈但鬪競爭春呼春巢成多
夏卵衆明年計此更有餘
非唯喧呼亂人耳漸恐巢穴
妨人居收殘射中豈無道
我亦力可彎長弧林深枝曲
矢不入況弓待借家所無

行吁坐眊不可奈安得靜默投身俱

哭詩六章

死者徒已死思之恨無涯生者非素心還作死者嗟今
古悲略同斯道竟奈何哀絃直易絕哭詞曲難歌

朝哭聲吁吁暮哭聲轉無聲無血隨盡安得目不枯目
枯不足嘆無目心自安目存多所見不若無目完

切切切切淚盡琴絃絕憤氣吐不出內作心肝熱朝
漿渴不勝莫潦濁不清何以慰我懷安得滄海水

哭莫傷滄海淚落長海流
滾風濤多駕蕩覆我舟不
若灑春草荆榛蕪蔓莖怨
氣觸草灰猶得香蘭生
朝歌憂思多暮歌無奈何
偶嘆氣亦絕未慟血先沱
淚落入口少不如出眼多
安得堂堂軀不為瘡且瘡
目雖淚所出由來心乃源
白日照我面意欲乾沱瀾
而不照我心我淚何由乾
況在重雲遮使我何自安

張巡

祿兒射火燒九天鬼手不撲神
聽旌羣庸仰口不肯唾

反出長喙噓之然睢陽城窮縮成鼃危繫一髮懸九淵
巡瞋睨遠兩背折怒嚼齒碎鬚張肩恨身不毛劒無翼
不能飛去殘賊燕翁軀腥刀子磔俎日嚼肉血猶經年
霽雲東攘兩臂去西來才有九指還曾中憤氣吐不散
去隨箭入浮屠塼忠窮智索莫自劾更嚮愛妾嘗饑涎
我穀沒日賊不食恐其肉醢死不痊又疑身骨不化土
定作金鐵埋重泉何時山移陵谷變發出鼓鑄戈或鋌
吾如得之願有用不誅已然誅未然

贈李定資溪

涉川固有道造舟不如梁曾聞水覆舟不聞死乘扛奈何揭厲子先先勇褰裳豈盡水害人固亦謀非臧

鳳雖謂靈畜無竹或

一作終

死饑竹今無方無鳳來亦云

一作何

時使之羣

一作隨

鴟鵂饑飽為止飛非惟失所靈亦

與彈射期

坦坦誰之田施施繳且弋鳥來玩其機鵲至喜其食長鴻飛冥冥志與萬里極豈無啄飲心寧饑不人得

湍激日蹙蹙風稜勢漫漫奈何舟上人試死才一間苟
不以利涉安坐思誠艱客雖懼謀梁而木嗟在山

古廟

古廟隆隆敞庭扉風雨剝壁頽柱榱我來安知神所依
宮堂憲宰風幡旂神君龐軀突鬚眉視我睨坐倨箕
惕礫觀者駭不怡羣鬼後先張福威直東之廂步逶迤
目益所見怪可噤馬牛羊犬雜豕雞或戴以首旁四支
間有人面身亦非老祝趨前為衆詞口吻聒嚙言盟呶

稱別狀類顧東西唱號名字分何誰空虛冥漠非所期
豈亦以此為人尸視其膚革已彪狸寧有中反恬肝脾
又有械器身挈持傳言厲疫此乃資古之日行歷虛危
猶恐盛陰鬼所隨礫儼于門驅使馳今安取此廟以祠
不念延虐殆尫羸農年凶多苦餓饑苟幸得飽不擇祈
來則拜叩盡敬祇幸天之澤偷自歸民德且恐報之時
餼有豐鮮牲魚肥欲奠以獻更濯巵進謝千語拜百低
工鼓于庭巫舞衣祝傳神醉下福禧農謝神去祝徹之

庭前剪割棄餘遺鵲烏下爭趨不飛回顧神面如故時
意者不為祭謝移嗚呼神固一作信非吾知

雜詩

方春不種蘭終歲無自佩良田弗加芟徒穉亦無歲空
令雨露恩日夕被蒿艾安坐饑怨天此理果誰在

一日不為田百草已有根况復閒三時其穢何待論豈
不有錢鏹徒羞慵借勤歲晚憂不耕何獨議耒耜

穠穠晚春樹上下聚百蟲不有口似蠶則生尾如蜂設

不二者然亦徒生無庸清陰不可居晚歲還秋風

答問詩十二篇寄呈滿子權

有序

今既愛盧仝蕭宅二三子之詩而猶恨其發之輕也
然忘其効而更重之則得矣逮子權之起予予實慕
之輒為十二篇其題亦不易子權所謂東墅諸子答
問者予獨廣之爾其水車之篇獨異于子權然特其
文則然吾知子權與吾與它知詩者謂為異也

鋪問末

金堅雖不磨木曲亦已揉幸蒙主人用反要主隨走適
從慵耕兒雖功不見取良田常無收何塞不耕咎

未答鏹

三首

我用常在金任金適由木苟得金為用何惜木微曲幸
得主人隨不恤汗行犢必求隨主人我用誠不足

我用于主人良田無虛種主人不我以我適為無用不
知主人饑卒歲安自奉由來我求人孰與求我重

我必為人用不必用于人若也責不耕君其問諸田

耒問耨

一畦失之荒爾力亦可耨天下方漫蕪爾功亦何有

耨答耒

天下方漫蕪顧我適有庸使其已除脩我將何以功我
豈大無効自是用我慵

耒問斧

子斧誰爾為黑白太分別朝伐一樗歎暮伐千樗藥爾
終不自謀幾日不缺折

谷答來

大槁吾猶伐小槁何畏蘖吾缺猶俟磨爾折將奈何

水車問龍

來何必召雲去何必飛天我名不為龍何能雨爾田

龍答水車

神龍謝子車子能未足多上潤雖已然下竭將奈何

水車謝龍

水車謝神龍下竭固無奈旱則我為用爾龍尚何謂

龍謝水車

神龍謝水車吾語爾來前爾雖用于人我亦用于天在
物固不同于用豈殊然水下高田乾爾能俯水取假人
不爾用爾售田責否吾雖身為龍動亦天所主天猶不
有命我安事為雨

中夜

晝日苦卒卒忽焉不加思長夜漫不眠起復日所為所
為浩多愧不與初心期虛云聖賢學實從庸俗歸雖耻

猶奈何長歌涕垂頤

書懷寄黃任道滿子權

西風吹雲空晴日露高曦
駑馬無速騁歸客思遠屈長
林剝霜紅遠水漾寒派
露蟲悲自一作目咽風菊老尤介

昔子來方春熠熠樹生態
今歸亦未幾馬踏落葉壞時
物固有然盛衰信難概
吁嗟為生勞黽勉計無奈
伊余有遐致久此困俗械
嘗思擺絕去自放出世外
高懷樂天寬遠目斤人礪
有田足晨昏有圃且菹菜
父母不待

養妻子固易賴世孰得丘山亦孰失蒂芥人自能輕重
吾將守所愛六經老誠明萬古熟成敗得時為醢鹽滋
味和鼎鼐失猶有萬世令名自沽賣自視久已明決不
俟謀蔡寄詩侑子觴期子和而再

令既有高郵之行而東孝先兄弟索余詩云

擾擾利學者久不可與謀讀書乃何為老不知軻丘弗
恤義所在務期高爵收嘗聞失則嗟不聞得之羞知誰
洪其源使世乘其流于今已汗漫更久將溯游嘗聞古

人言饕餮為共兜謂惡豈必多偷飽德弗脩不知自思
者捨此何所由故予早知懼誓將異人求寧為寒餓嗟
不同富貴謳此行況有獲師德高前修因當請子行勉
子無逗留于吾乃何有同病不獨瘳雖愛謂子然尚穀
子終不惜子有高材竿幢揭華旒苟能自擺去不為世
學囚行將見遠到強弩射弱叢何必請子詩自合治子

輶

酬東丈貺詩兼叙所懷

白日立中路犬去不形相夜以盜自來何敢怨犬傷主人忽如念謝怒犬無良盜子愧伏前有言願加詳見賜固已多怒犬誠未臧

卜居

吾求一屋逮兩月貧不謀貴何以圖竭來自放就窮巷幸得之喜何敢吁頽簷斷柱不相締瓦墮散地梁架虛門無藩闌戶不開時時犬彘入自居主人憐我莫自致為我補葺加墊塗翻翻匠氏乃誰子頽頽作氣厲呌呼

羣庸洶洶助聲勢睥睨凌我要我酤歸來嘆息無自得
兩目纔致酒一壺徵多償少意不愜棄我忽去如逃逋
重來問寂不可問依舊四壁編空蘆嗟予雖貧日猶爨
可不善為盎釜謨外戶不閉古則爾今也盜賊通街衢
乞錢買籬作藩固更學闕鍵防朝晡鄰翁問我乃何者
得無亦以自名儒王朝潭潭聚冠蓋幾人不載卿相車
子何布被不蓋肉浪自名士實則奴假為無能等編戶
猶可自擇安閭閻胡為慘戚卒因此去矣何屋不可徂

此居卑洼不待說四高中下流無渠夏霖連延久
積注往往竈下秋生魚始來圖此不自擇終見坐
與蚯蚓俱何況梁榱日蛀腐一仆非爾力可扶苟
求暫安急旦夕反以身就殞壓虞迺知窮則失自
愛死得正命有幾且翁乎爾言誠得矣我方困甚
非真愚

送李公安赴舉

行子冠上塵梁宋道傍土塵逐冠弊捐人來還復去馬

蹄日月長踏盡西北路近日何紛紛姿狀頗秀舉傳言
天子詔士得四方赴來如鵲翅翻去若蠅頭聚市兒屈
指計過百日未暮昔周方盛時得士纔十數唐虞此為
盛中復容女婦昔何稱才難今也寧異趣但恐所取異
今古殊尺度夫君乃高才久有及物慮今又奮絕去挺
拔欲自樹余窮非所知久有山林素但無百畝粟乃就
羣才賦仕道得亦嗟困窮失為懼二者各有命子亦何
所與

離高郵答謝朱元弼兼簡崔伯易

昔來何悠悠今去亦泛泛
豈自果進退姑且便飲啗
三代去今遼士食久已濫
徒死不為義可無苟石擔
平生墮百為且就役鉛槧
束身入世程開口就人歎
怒喜有失得眉睫煩窺瞰
野鳥或在籠山猿有終檻
能安此為命雖失亦何一作何所憾
予嘗勇自明磨古得前鑑
抱關賢所容較獵聖或暫
庶未負初學尚為神所監
予行人之嗟我笑不為領
子獨辱所厚以詩繫歸纜
命和始自書

狂言庶非僂

山陽思歸書寄女兄

淮風晴舒舒楚水日夜流風能駕吾帆水可載我舟余
歸知幾時子望懸百憂念我兄弟寡商參各殊州十年
不一逢會合何所由幸逢子來歸與我相慰投甥兒入
吾牽甥女出我留子吾笑其間貧不知可愁心如熙春
陽樂若醉九酬憶我別子日將行更逗留泣恐傷子心
淚出仰目收別日纔幾時別思日九秋心隨西北風日

望東南樓主人仁且賢憐我羈旅游晨粳玉炊香暮酒
金注甌盤蔬羅春青豆脯魚夕鱸為食豈不美義咽不
下喉要當歸子同半菽飽亦優始予志所學義當望軻
丘竭來與世評衆口忽起咻嘗觀世金朱此道久已偷
胡為不奮去附世如贅疣而子亦待人特以貧不謀參
差兩如此偃蹇勢略侔要當共引去逸出世網果遐追
避世徒子與侍巾裘吾將亦娶婦力以石臼求買田結
歸廬種樹屋四周子居課桑蠶我出鞭耕牛教妻績以

篋使兒餉來疇坐笑忘歲時聚首成白頭歸乎當何時
詩以侑予謳

大舟

大舟無風帆不舉小舟榜入青冥去舟中漁子呼且歌
夜半鬪魚誰得多

望花有感

春來幾時余不知但怪日日柳稍好我嗟無地自種花
常恐東風只生草誰家有園不可入時時縱足信自到

寒梅最香落已闌
桃杏雖遲亦顛倒
高枝飛鳥夜踏空
低樹狂兒日摧拗
惟餘零落滿地紅
主人更聽奴頻掃
歸來四顧慷慨歌
要且傾酒澆顏酡
春歸欲挽誰有力
河濁雖泣庸奈何

餓者行

雨雪不止泥路迂
馬倒伏地人下扶
居者不出行者止

一作
返

午市不合人空衢
道中獨行乃誰子
餓者負席緣

門呼高門食飲豈無棄
願從犬馬求其餘
耳聞門開身

就拜拜伏不起呵羣奴喉乾無聲哭無淚引杖去此他
何如路旁少年無所語歸視紙上還長吁

暨陽居二首

出無王事牽入不治居舍蒿藜入墻屋塵垢變几架糟
糠苟無憂智力取自暇逢詩即廢日得客輒忘夜積懶
遂成性習勤反如詐幾不類怠傲愧耻將何謝

身非爵與官車馬久不謀家無田倉儲雀鼠非我仇朝
出從人居詩書講前修暮從兒子嬉歡笑何所憂閒將

筋力疲懶使志慮收斗筭尚煩送誰謂能無求

謝客二首

擾擾車馬客各以勢利奔自問閭巷人何為亦紛紛與
客成往還勉就俗所敦禮不經聖人頗厭後世煩欲問
無所得歸視紙上文以非孔子心尚拜陽貨豚乃知偈
仄間心跡久已安去矣可奈何更問來者門

躑躑出何為奄奄歸就卧不知身所謀徒與俗相和本

無聲利求

一作營

久厭車馬過詩書雖滿前奔走不暇坐

收身衣食餘抱病歲月破得不勝所止進亦何可課前

躅杏

一作
薺

難躋下愚旋易墮得勢有然爾命矣何可奈

一作
所那

春游

春風誰相呼鳥語到庭戶罷書起何游

一作
往

繫馬城西

樹寧須客衆隨聊與春相遇高林美風竹疎影有清覆

可以便行坐解脫快巾屨日長天地寬飄戾飛雲度風

枝綠未柔

一作
舒

日萼紅先露芳辰信可尚嘉興借無寓

舊聞黃公廬頗

一作
屢

枉壯士顧予雖輕數子自適偶同

趣起解身上衣就貰青旗酤獨酌不待勸興至還自注
對物無所語似若喧嘩惡雖無歌舞歡幸可篇章賦乾
坤本閒暇人物自紛遽勞生曷不樂歲月失已屢酒闌
起四望落日不可駐饑馬自知家何須問歸路

送曹杜赴試禮部

霜風琅琅鳴鼓輦鳥寒夜噪樹折枝居者不出行者歸
旣馬解銜車棄脂長河夜水船就維百賈晏起朝閉扉

為問當今行者誰出門千里到何時母送拊背父嘆嘻
兒惜欲去哭挽衣上馬反顧紛涕洟非所願欲去何為
家雖有田豐歲稀所得償公不及私况望羶腥事庭闈
結髮從學今十暮始自有志狗孔姬豈願從世成依違
高堂華髮紆素絲暮年待子為光輝望我日久莫報之
苟得一笑辱弗辭况望舊作得三釜家無飢吾于二子久
所知怪其才高所就卑今乃語此誠可悲近聞天子變
典彛欲撥舊冗收新奇子行出仕適其期驂騑得路無

銜羈罷酒行矣無自遲去取天寵酬親慈

野步

久嬰末俗喧脫就綠野靜方求巾屨便那暇賓客命林

紅落春哀草

舊本作桑

綠爭夏盛時從老農語久佇行子聽

謂言勞苦後各以閒暇慶時逢瓶盎沽亦有肴核稱喧

嘲忽無次歌唱仍相詠酒闌紛起坐白髮忽

一作或

兩凭

兒乘旁樹嬉牛卧前籬暝予方困俗累愛此近天性何

當從之歸買舍與相並

古風

古風何寥疎世方盛夸慕利塗劇先趨直軌迷曲駐渾
渾九河翻仡仡百川注分爭或多岐歛枕纔一趣睢盱
承至歡讐疊謝絕怒財得升斗多勉售形骸雇不知萬
鍾得孰與一日裕况承丘山羞願易頃刻遇誰能脫近
役自放就遐鶩航湖足菱魚拔野厭芼菇行招千古游
坐與來世語延風敞虛襟揖月坐嘉樹此意固有然童
兒未堪預

旅次寄寶覺訥師

小雨破宿暑曉風忽焉邁山深樹翳陰蜩螗應已秋清
坐想高絕語言誰應酬豈不念一往抱病終自留羈旅
少往還有來或非儔命僕一謝之縱我冠屨休移牀上
高堂解書散牀頭于此有嘉興念世誰與謀獨思山林
人茲意可綢繆何當買田廬共遂兵壑游

寄呂惠卿吉甫兼簡林伯通

跋跋門外馬客至知謂

一作為

誰昔面尚未逢那論心相

知揖客拜上堂

一作拜客揖上堂

謝客辱弗遺寒暑相問酬唯

諾坐無為靜默近尤怨多言足瑕疵勉從客所論還顧

所學非念此廢無益對書坐長嘻

一作為此嘆無益廢書坐長嘻

獨思

同懷子念遠莫見之豈無寄我書歲晚得苦遲聞頗困

王事豈無閒暇時況有同僚賢相期在詩書人生天地

間常苦食所縻去就兩莫謀會合寧有期余病不自樂

舊學益以隳近者非所同遠者勞夢思江水日夕東道

塗宛而夷寄書當在勤無謂還往稀

答逢原

呂惠卿

晨出趨長司跪坐與之言偶然脫齟齬相送顏色溫
歸舍未休鞍簿書隨滿門相仍賓客過款午僅早餐
平生性懶惰應接非吾真况乃重戕賊良氣能幾存
就夜甫得息閱我几上文開卷未及讀睡思已昏昏
自知小人歸昭昭復何云每于清夜夢多見夫子魂
側耳聽高議如飲黃金樽覺來不得往欲飛無羽翰
昨日得子詩我心子先論怪我書苦遲友道宜所敦

豈不旦夕思實苦案牘繁豈無同官賢未免走與奔
相見鞅掌間有言無暇陳嗟嗟茲世士無食同所患
念我力難任聞子謀更艱久知為之天安能怨窶貧
吾聞君子仕行義而已焉亦將達吾義肯遂為利牽
東海有滄溟西極有崑崙古來到者誰不過數子尊
子已具車航吾亦為檝輪欲一從子游不知何時然

寄崔伯易

擾擾閭巷士過我何所為屢來徒我煩不來我弗思少

年樂知聞喜與客子隨晚歲事恬默與世益參差騎馬
出尋人中路輒自歸歸來亦何樂書史自相期已與往
者親可無茲世違欲語無所得起視北雁飛念子遠千
里昔別今已暮寄聲雖云多所得竟亦稀近者忽報書
期我往就之不知子苦窮繫此不可離尚迫朝暮憂寧
有道路資人生少所同老去纔幾時子勢既若此子復
不甯來但恐百年間齟齬終莫齊詩以寄子招亦以寫
我悲

寄孫莘老

默默不自得勞勞非所任不與君子逢誰復明此心偶
客來自南口有千里音知無木索勤頗復山水吟對之
為一笑欣如獲千金宣城風物佳古語昔已忱太平又
其右道塗邈幽淡溪流渺彎環山勢屹抱臨况復寂寞
人黃綬事陸沈公田秫既收客席酒屢斟悔予昔南浮
不往一就尋波濤忘日月疾病廢古今歸來就羈銜外
慮日已侵適時愧非才對客輒自瘖譬如火炙膚暫恣

久莫禁唯思百畝田為可足
金鸞投身脫世簪歛足蹈
古箴寄言所同懷相期在中林

夏日平居奉寄崔伯易兼簡朱元弼

天風變春和晝日差夏永
門闌閑無事燕雀去益靜
紛翻詩書帙棄散懶收整
時來就枕卧復可取窺省
心恬逐物閒迹濶與世屏
鮮鮮南山暖秀色上脩嶺
苟嫌安坐慵還可遠游騁
自緣智能薄反得閒暇幸
交朋友久相遠疎懶欲誰警

憫憫庭下樹陰影日已敷癯癯閉門人簾席自卷舒高
技就懸冠曲枝挂裳裾一作襦還來從此息卧視詩與書栢

栢門外客相從駕驪駒不知來何聞一作為乃肯顧我閭

呼兒往應門謂言出在途非我敢厭客非客與我疎以
予拙語言無以得客娛一不當客意恐與世患俱不如
兩相忘何能効紛如

送朱明之昌叔赴尉山陽

朱侯拜書天上回去以身試百里障青衫飄若風外荷

借馬載出塵土上準眉嶄嶄見天秀如立繫馬萬里望
身驅雖小胷腹寬沛如絕海橫秋漲久宜脫絕事高致
豈願卑冗勞俗狀高堂華髮親老矣四海無家寄几杖
世外言高信獨奇人前腰折嗟已強尉官雖小俸雖薄
猶有餘錢買甘養想當家惟奉顏面綵衣躬率婦子餉
詵詵兒女戲滿前累累諸凡坐相向人間此樂不可幸
一笑自足百辱當時清固應稀盜賊俗弊寧不煩管掠
好偷閒暇事簡編思我寧無文字况

學子

瑣瑣來學子從我問古風謂

一作吾

言古之人學不求世

功以其明智餘施與天下同能知學為身自不恤窮通

童子顧我笑是言得無蒙斯道使可遵曾不聞父翁謂

言童子歸盡自謀厥躬吾不能爾言

一作吾能為爾言

亦不必

爾從

寄滿子權

昔心何悠悠今學益漫漫恭如浮江河浩不際涯岸生

雖樂文字勤不償几案重編空堆塵折簡久枯汗徒如
陳市肆表列環四畔已無探討勤胡可賢否按零丁晚
觀玄泯滅舊習豕得指來歲期失忘去日算嘗聞勤惰
間已是愚知判蒙羞欲何顏避耻愧無翰不能繩已怠
何力禁人叛文章觸世嫌議語限客竄時牽好惡卑俗
撓是非亂早哀奪舊剛多病襲新懦心經衣食難事廢
朱鹽半何謀脫身去割跡與俗斷耕荒食新收鑿室復
舊貫念生如冬水至成僅春泮其間能幾時何恃苦自

綏翩翩淮南英顯顯士林觀方子未為遊辱子昔同開
篇章覲新華論說聽橫捍包奇晚自走去實王府玩近
書何相撩頗以名見謾不知老者拙棄此久已斷方思
勇自樹解轡縱新驛行期拾春青采綬綰歸腕乖離思
舊歡遷徙就新絆無琴雖自歌有酒欲誰伴閒暇當寄
詩持此資賀換

暑旱苦熱

清風無力暑得熱落日着翅飛上山人固已懼江海竭

天豈不惜河漢乾崑崙之高有積雪蓬萊之遠常遺寒
不能手提天下往何忍身去游其間

寄王正叔

微生不過人氣力兩眇靡力學失自謀徑古趨今左病
世相陷賊樹性期剛果豈不中是時然亦未嘗過奈何
衆好殊未語咻已夥張儀獨何之去去銳亦挫忠言不
售耳直面屢得唾怒目瞋以環謗口焰而火出門先自
羞有衣恍疑裸過市不成步侶距侔鼃跛周旋不出扉

迷若蟻循磨人惡固為甚自厭近亦頗媚世定有術欲
學從誰可必也況自售恐由此始禍賢子遠相問幸有
以教我得報速是宜翹企不容坐

雜詩効孫莘老

魚鰕無所能動輒困人得蛟鯨能則乖覆舟取人食龜
鼈雖謂殊剝剝同一劇龍不入網羅亦不為人識

犬羊養於人壯則人食之猛虎嗜人肉終昧獵者機豺
狼與狗同為害豈必威封狐能為人還作行子妻

雜詩呈逢原

孫覺

鴻雁最知時未逃羅與網不能忘稻梁千里安得往
鳴蜩腹空虛見啄因其響丹鳳穴九霄虞人常夢想
呼雞

雞呼雞來前犬吠犬至止夫豈必可召役以食乃爾今
吾曷為悲人而雞犬為自計無自存西山謝夷齊

姚堅老見約偶成

初正布新和餘臘爭近候升騰陽力微惟怯老陰鬪江

雲蕩空碧

一作無據

疎朝一作

雨沐清晝林梢釋冬枯土蘗壯

春簇蒹蕤風日舒刻畫山野秀關關先春鳥格磔弄晴
味無人與調和終日自嘲詬唯君卜近適過我許來就
遷延日屢蹉嘆惜月復蝕人生誠多故世事那可究唯
當自推置障絕俗慮寇休閒倘能偷疎懶當自有徒行
苟憚勞借馬欲誰廐清醕如定攜佳客可先購勉之無
使遲梅萼已堪觀

初聞思歸鳥憶昨寄崔伯易朱元弼

去年春日花盛開嘗有鳥啼歸去來余詩告爾東海志
子笑屬我南山杯將希遐躅蹈高軼就拔去跡離俗埋
同時游者最誰上朱子峭擢凌春材門闕午景卧正懶
過我呼號如春雷鄰驚偷窺婦女怪婢駭奔一作棄走兒

童咭門開納坐聽論列笑口侈哆傾胃懷寒菹半菽要
同飮蠶醬叫乞喧鄰隈僧從南浮橐異角尉解西去亭
遺臺心爭誇漫詰蜿蜒目樂虛豁留崔嵬柳梢黦黦空
晴絮杏花爍爍翻遺埃春湖平渟照空碧淮帆曉上攬

天梳西歸頗昵窮餓久南泛未免丐乞哀竭來隨人事
卑折忽自顧影漸低推平時客坐不敢語苟以唯諾償
嫌猜胷中約結浩千萬到口不吐如橫枚比來頗自撥
俗礙日傷竹樹良徘徊昏昏萬事置不省知已疎懶心
難裁一開春風動啼鳥猛若重睡忽喚回咨嗟歲月急
若失嘆息無地安蒿萊比于見人日加懶行恐合俗老
益乖不知飄浮寄茲世竟亦何計收形骸春林沾沾風
日好飛止自便宜爾詣何為猶道歸不得世間萬事真

悠哉

思京口戲周器之

江南別日醉方醺
貪愛青天帶水痕
忘却碧山歸路直
誤拔浮世俗塵昏
終期散髮江邊釣
當有漁舟日繫門
但恨故人猶喜仕
他時胷腹未堪論

寄東伯仁

身逐南舟去不廻
匡廬留滯得裴回
峰頭夜宿平看斗
巖下朝陰俯聽雷
西顧波濤浮日月
東歸天地入塵埃

何時得遂幽棲志常把韋編靜處開

對花

憂愁卒卒人無樂花草紛紛物又春
安得無憂與無慮
對花還作笑歌人

春遊

春城兒女縱春遊醉倚層臺笑上樓
滿眼落花多少意
若何無箇解春愁

春晚雨後

東風柔弱事春權
劇雨無端轉愴然
不惜好花都委地
却令遠草直平天
龍蛇久蟄應思奮
蛙蝸乘時已自先
綠柳由來却堪笑
葉眉愁劇遂長眠

紙鳶

誰作輕鳶壯遠觀
似嫌飛上未多端
纔乘一線憑風去
便有愚兒仰面看
未必碧霄因可到
偶能終日遂為安
扶搖不起滄溟遠
笑殺搏鵬似爾難

古鑑

一片靈光合有神不知鎔鑄竟何人春耕破冢衣冠盡
鬼手摩天日月新鑑面祇知西子姣照心難見比干真
主人淡有收藏意當待清明不受塵

和東熙之雨後

獵獵風吹雨氣腥誰翻碧海踏天傾如何農畝三時望
只得官蛙一餉鳴何處斷虹殘冷落有時斜照暫分明
雷車收轍雲藏跡依舊晴空萬里平

幽居感懷寄滿子權

卜得幽居四絕鄰尋常庭巷斷蹄輪門前犬豕卧橫道
城上牛羊下視人滿眼夕陽閒草樹回頭歸路正埃塵
思君未見東來計何日雙眉對面伸

秋懷寄呈子權先示微之兼簡孝先熙之

樹哭寒蜩草哭蟲何堪羈客憤時窮卒無可樂羣書外
百不堪言一嘆中雲黯暮天沉白日土塵平地斷清風
夫君若問秋來況淚滿遺編髮亂蓬

九日寄滿子權

懶將衰病照清流為有歸心欲白頭
幸自好花開便笑不甘為客見成愁
長歌欲強秋風醉高處先輸俗子遊
我在無聊元亮死當年今日共悠悠

次韻子權京口夜宿見寄

寒江漠漠客帆稀獨泊扁舟望翠微
已寫綠醺聊自適更邀白鳥共忘機
水閒海月寒初上樹盡秋城碧自圍
嗟我相思邈千里不來同此兩忘歸

答孫莘老見寄

高門鞍馬日光榮
勢力紛紛起共爭
偶以不能聊自便
敢于茲世獨求清
生無人愧寧非樂
死有天知豈待名
客食官居同是苟
何須稱別異平生

登郡樓

江城朝雨濕晴煙
樓上風帆送去船
苟得息肩閒歲月
時來開口笑山川
田園啼鳥三春日
江海扁舟萬里天
何計脫身來此老
青山白髮兩忘年

感憤

二十男兒面似冰出門噓氣五蛻橫未甘身世成虛老
待見天心却太平狂去詩渾誇俗句醉餘歌有過人聲
燕然未勒雄心在不信吾無萬古名

登瓜洲迎波亭

海面清風萬里寬偶來如已脫塵關自嗟客世無虛日
却被斜陽占盡山海鳥不來青嶂靜漁師歸去暮江閒
從來雲水有期約直待功成是厚顏

憶潤州葛使君

六朝遊觀委蒿蓬想像當時事已空

一作清談
事竟空

半夜樓

臺橫海日萬家簫鼓過江風金山寺近塵埃絕鐵甕城

淡

一作高

氣象雄欲放船隨明月去應留閒暇待詩翁

何處難忘酒

何處難忘酒窮才世不知出門無直道開口礙當時白
髮無端速青山不忍歸此時無一盞何以活餘黎

庭草

平時已多病春至更蹉跎惡土種花少東風生草多客

愁渾寄淚野思不堪歌獨有詩心在時時一自哦

秋日寄滿子權

樓前春靄暗平林樓上人愁意思深未必薄雲能作雨
從來秋日自多陰三年客夢迷歸路一夜西風老壯心
欲作新聲寄遺恨直絃先斷淚盈琴

江上

羃羃荒城沒遠煙暮雲歸族忽相連春江流水出天外
晚渡歸舟下日邊杏萼春波翻淺纈柳花風遠聚晴綿

無錢買得江頭樹輸與漁人繫釣船

送聶隅黃先生

黃風吹土截天橫瘦馬着鞭驅不行尚說苦心酌直道
誰知白髮為蒼生平時志節恬忠藎常日公卿足仰成
雖有英雄無用處却令老去買牛耕

寄介甫

天門簾陞鬱鬱巍巍勢利寧無澹泊譏難與跣徒爭有道
好思吾黨共言歸古人踽踽今何取天下滔滔昔已非終

見乘槎去滄海好留餘地許相依

寄滿子權

窗前午枕夢忘還門外清風晝掩關天下誰當千古後
牀頭自笑六經閒能將道繫窮通裏安用身干進退間
自愧公心猶有蔽清時無日不思山

寄都下二三子失舉

大學齋鹽共苦辛寒窓筆硯日相親梁王臺畔一分袂
揚子江頭三換春篋裏黃金須買酒鬢邊白髮解欺人

窮通得喪誰能定況是男兒有此身

次韻滿子權見寄

當世雄圖不可懷退居蒿艾自沉埋門無來足荆生道
病不能鋤草上階自是直方為世易況將疎懶合人乖
無由與子同樵種回首平林浪可柴

病中

十日身無一日寧病源知向百憂生寒侵騏驥應方瘦
蠹滿榱桷豈易榮小閣晝閒書帙亂畫堂風靜藥羅聲

北山扶杖終歸去寄語巖猿莫曉驚

金山寺

萬頃清江浸碧瀾乾坤都向此中寬樓臺影落魚龍駭
鐘磬聲來水石寒日暮海門飛白鳥潮回瓜步見黃灘
常時戶外風波惡祇得高僧靜處看

登甘露寺閣

忽忽勞生歲月催時偷高迹山浮埃風沾草樹紅朝動
春入川原綠夜回欲出壯懷臨八極可無樽酒到高臺

江山不與人相語似待忘言野客來

謝張和仲惠寶雲茶

故人有意真憐我靈薺封題寄華門與療文園消渴病
還招楚客獨醒魂烹來似帶吳雲腳摘處應無穀雨痕
果有同嘗竹林下寒泉猶有惠山存

太湖

西南無盡望吞恐罄吳郊海近私憑蓄天低不敢包蛟
龍宜自宅螭蛭莫令巢遠浦纔分點歸檣略認梢水乘

潮更濶地過底宜坳鳥截煙維斷風凌浪脊交大橋橫
作畫別岸缺成文吟恐詩無氣圖憂筆費鈔歸輸范蠡
得官許季鷹拋去憶心應繫歸誇口定饒窮何須蹈海
來好卜編茅著戶生同隱居民釣自庖滄浪未容濯魚
樵夜停敲

宋詩鈔卷二十四